

NREB dicadang ambil alih peranan kendali PTPP Negeri

Proses ambil alih peranan tangani pencemaran minyak di pantai daripada JAS Negeri Sarawak sejajar dengan MA63

Oleh Mohd Aliff Idzwan Abdullah

MIRI: Lembaga Sumber Asli dan Alam Sekitar Sarawak (NREB) dicadang mengambil alih tugas dan peranan selaku pemegang kepada Pelan Tindakan Pembersihan Pantai (PTPP) Negeri daripada Jabatan Alam Sekitar (JAS) Negeri Sarawak, sejajar dengan proses pengambilalihan kuasa di bawah Perjanjian Malaysia 1963 (MA63),

Timbalan Setiausaha Kerajaan Sarawak (Pentadbiran) Datu Buckland Bangik berkata, beliau amat mengalu-alukan cadangan itu dan pada dasarnya, menyokong langkah dan tindakan yang diambil oleh kedua-dua pihak di JAS dan NREB.

“Jika sebelum ini, JAS Negeri Sarawak merupakan pemegang kepada PTPP Negeri sekali gus menjadi urus setia dan penasihat kepada JPTM (Jawatankuasa Pembersihan Tumpahan Minyak) Negeri.

“Namun dalam proses pengambilalihan kuasa di bawah MA63, telah dicadangkan tugas dan peranan tersebut

diambil alih oleh NREB selaku agensi negeri yang berkepentingan terhadap penjagaan dan pengurusan alam sekitar termasuk pengurusan Buangan Terjadual atau buangan berbahaya yang terhasil daripada aktiviti pembersihan pantai akibat tumpahan minyak,” ujarnya.

Beliau berkata demikian dalam teks ucapan yang dibacakan oleh Timbalan Pengarah Unit Keselamatan dan Penguatkuasaan Sarawak (UKPS) Datuk Clarence Rorote Sagon pada Majlis Perasmian Latihan Melawan Tumpahan Minyak Ex-Empurau 2024 di sebuah hotel di sini, malam kelmarin.

Buckland yang juga Timbalan Pengerusi Jawatankuasa Pengurusan Bencana Negeri Sarawak (JPBNS) menjelaskan, di bawah PTPP Negeri telah dinyatakan dengan jelas peranan agensi-agensi di bawah JPTM serta menggariskan struktur tindak balas sekiranya berlaku kejadian pencemaran tumpahan minyak di pantai.

“Di bawah pelan ini, agensi utama yang perlu menggerakkan tindak balas dalam



PENGHARGAAN: Morris (kiri) menyampaikan sijil penghargaan dan cenderahati kepada wakil jabatan dan agensi kerajaan yang menyertai Program Latihan Melawan Tumpahan Minyak Ex-Empurau 2024 di Miri, malam kelmarin.

kata lain mempengerusikan JPTM adalah Pengerusi Jawatankuasa Pengurusan Bencana Negeri bagi kejadian pencemaran melibatkan dua atau lebih bahagian yang juga dikenali sebagai tindakan pembersihan peringkat negeri.

“Manakala sekiranya kejadian pencemaran hanya melibatkan satu bahagian contohnya kejadian pencemaran hanya berlaku di pantai sekitar Miri, Residen Bahagian Miri akan mempengerusikan JPTM bagi tindakan pembersihan

“Jika sebelum ini, JAS Negeri Sarawak merupakan pemegang kepada PTPP Negeri sekali gus menjadi urus setia dan penasihat kepada JPTM (Jawatankuasa Pembersihan Tumpahan Minyak) Negeri.”

Datu Buckland Bangik
Timbalan Setiausaha Kerajaan Sarawak (Pentadbiran)

peringkat daerah atau bahagian,” jelasnya.

Dalam pada itu, beliau berkata penganjuran program Latihan Melawan Tumpahan Minyak Ex-Empurau 2024 yang dianjurkan bersama oleh JAS, Petronas Carigali Sdn Bhd (Sarawak

Asset) dan NREB merupakan satu inisiatif yang sangat baik.

“Saya percaya polisi industri sendiri telah menetapkan agar pengurusan kecemasan alam sekitar adalah menjadi prioriti utama.

“Pengendalian kes-kes kecemasan seperti pencemaran alam sekitar perlu dilaksanakan dengan teratur dan sistematik.

“Matlamat utamanya adalah untuk memastikan pengoperasian industri minyak dan gas khususnya tidak mengakibatkan kes-kes pencemaran alam sekitar yang akhirnya mengakibatkan suatu bencana berlaku di sesuatu tempat,” ujarnya.

Tambahnya, penglibatan semua pihak di dalam Latihan Ex-Empurau kali ini baik di pihak kerajaan persekutuan mahupun negeri, sektor swasta dan orang awam merupakan satu jalinan kerjasama untuk memastikan pencemaran dapat dibendung dan diatasi bersama.

“Saya dimaklumkan Latihan Ex-Empurau ini melibatkan agensi-agensi

kerajaan Sarawak di bawah JPTM Negeri yang mana bertujuan menguji keupayaan pihak berkuasa negeri dalam aspek pembersihan pantai jika tumpahan minyak mencemari pantai Sarawak khususnya.

“Melalui latihan ini, semua pihak akan dapat mengenal pasti kekuatan dan kelemahan dalam menangani kejadian tumpahan minyak serta berupaya memberi sumbangan yang terbaik, tidak mengira masa dan tempat berlakunya kejadian tumpahan minyak pada masa hadapan,” katanya.

Hadir sama, Ketua Pengarah JAS Dato Wan Abdul Latiff Wan Jaffar, Pengurus Besar Kanan (Jabatan Kesihatan, Keselamatan dan Alam Sekitar) Petronas Carigali Sdn Bhd – Hulan Morris Mail dan Kontroler Kualiti Alam Sekitar Sarawak Jack Liam.

Program Latihan Melawan Tumpahan Minyak Ex-Empurau 2024 itu diadakan selama tiga hari hingga semalam, melibatkan penyertaan 44 jabatan dan agensi kerajaan serta tiga kontraktor.